

OPPA ta cumpli 31 aña di existencia

Ta urgi gobierno pa institui e ‘Ouderenraad’ lo antes posibel

ORANJESTAD – Dialuna dia 26 di augustus proximo, OPPO lo ta celebrando 31 aña di existencia. E organisacion a cuminsa cu mas of menos 59 miembro y actualmente OPPO tin mas cu 1,600 miembro. Durante e aña cu a pasa, e organisacion aki a traha duro pa haya un reconocimiento como partner consultativo for di gobierno y e otro instancianan cu ta comprometi cu interes di su miembronan.

Na aña 1988, dos aña despues di Status Aparte, un grupo di pensionado publico a realisa cu e pensionadonan publico tabatin e necesidad di tin un representacion fuerte den nos comunidad y a funda OPPO, Organisacion di Pensionado Publico Arubano.

OPPO tin laso cu otro organisacion di pensionado pafu di Aruba, manera UPAH, Union Pa Adelanto y Husticia, di Corsou; BGNA, Bond van Gepensioneerden van de voormalige Nederlandse Antillen en Aruba cu cede na Hulanda y BBGO, Bond voor Belangenbehartiging Gepensioneerden uit Overheidsdienst, di Surinam.

OPPO ta representa un capital humano enorme, cu talento, sabiduria y yen di experiencia. Ex-trahadonan publico cu a traha duro y cu nan trabou a contribui grandemente na loke nos tin awe.

E generacion di pensionado publico ta ex-trahado cu a lucha pa algun causa digno y husto, manera democracia y paz, pago igual pa trabou igual; igualdad p’e hendenan muhe, eliminacion di racismo, etc..

Ta p’esey tur pensionado publico merece e respet y atencion di gobierno, nan famia y henter nos comunidad.

E añanan a pasa y awo e lucha di e grupo di pensionado ta otro. Awo nos lucha ta contra e discriminacion cu tin contra nos grandinan, simplemente pa nan edad.

Un sociedad cu ta considera e adultonan mayor un carga social, hende cu deterioro fisico y enfermedad, persona cu ta depende di otro, persona cu mal memoria y un analfabetismo digital.

OPPO sigur no ta acepta e percepcion aki y ta urgi gobierno pa institui e ‘Ouderenraad’ lo antes posibel. Nos kier sa kico gobierno ta bay haci cu nos!

Te ainda nos tin bon memoria, nos ta dicidi pa nos mes y nos no ta permiti ningun instancia/ gobierno pusha nos den un skina!

E rol di e pensionadonan den un comunidad ta di un valor incalculabel y nos sociedad, cu ta uno educa, mester probecha y duna un oportunidad real na e grupo di persona cu hopi experiencia y conocimiento. Mester ofrece nan

un oportunidad real pa keda activo!

Nos ta spera cu nos politi-

conan bira consciente y realisa cu no por sigui negligish e grupo aki, pasobra e realidad ta, cu e bida cu e pensio-

nadonan ta bibando tur dia ta comiendo nan poco poco, pero cu hap grandi!

